

БАТЛАВ

БАТЛАВ

БАТЛАВ



2025 оны 10 дугаар сарын 18-ны өдөр

**“МОНГОЛ УЛСЫГ 2026-2030 ОНД ХӨГЖҮҮЛЭХ ТАВАН ЖИЛИЙН  
ҮНДСЭН ЧИГЛЭЛ БАТЛАХ ТУХАЙ” МОНГОЛ УЛСЫН ИХ ХУРЛЫН  
ТОГТООЛЫН ТӨСЛИЙН ҮЗЭЛ БАРИМТЛАЛ**

**Нэг.Монгол Улсын Их Хурлын тогтоолын төсөл боловсруулах үндэслэл,  
шаардлага**

Монгол Улсын Үндсэн хуулийн Хорин тавдугаар зүйлийн 1 дэх хэсгийн 7 дахь заалтад “Хөгжлийн бодлого, төлөвлөлт тогтвортой байна.” гэж, Хөгжлийн бодлого, төлөвлөлт, түүний удирдлагын тухай хуулийн 14 дүгээр зүйлийн 14.4 дэх хэсэгт “Засгийн газар Монгол Улсыг хөгжүүлэх таван жилийн үндсэн чиглэлийн төслийг өмнөх үндсэн чиглэлийн баримт бичиг дуусгавар болохоос хоёр сарын өмнө Улсын Их Хуралд өргөн мэдүүлнэ.” гэж, мөн зүйлийн 14.5 дахь хэсэгт “Улсын Их Хурал Монгол Улсыг хөгжүүлэх таван жилийн үндсэн чиглэлийг өмнөх үндсэн чиглэлийн баримт бичиг дуусгавар болох хугацаанаас нэг сарын өмнө батална.” гэж тус тус заасны дагуу “Монгол Улсыг 2026-2030 онд хөгжүүлэх таван жилийн үндсэн чиглэл батлах тухай” Монгол Улсын Их Хурлын тогтоолын төслийг боловсруулна.

Уг тогтоолын төслийг Монгол Улсын нэгдсэн төсвийн 2026 оны төсвийн хүрээний мэдэгдэл, 2027-2028 оны төсвийн төсөөллийн тухай хуультай уялдуулан Хөгжлийн бодлого, төлөвлөлт, түүний удирдлагын тухай хуулийн 6 дугаар зүйлийн 6.7.1.а-д “урт хугацааны хөгжлийн бодлогын зорилго, зорилтын тухайн таван жилд хүрэх үр дүн, тоон болон чанарын шалгуур үзүүлэлт, тухайн шалгуур үзүүлэлтээр хэмжигдэх зорилтот түвшинг тодорхойлсон байх;” гэж, 6.7.1.б-д “хүн, нийгэм, эдийн засгийн хөгжил, байгаль орчны тэнцвэртэй байдал, засаглалыг сайжруулахад чиглэсэн салбар болон салбар хоорондын уялдааг хангасан байх;” гэж, 6.7.1.в-д тухайн таван жилд тавьсан зорилго, зорилтыг хэрэгжүүлэхэд чиглэсэн хөрөнгө оруулалтын төсөл, арга хэмжээг төсөв, санхүүгийн тооцоо, эх үүсвэртэй нь уялдуулан нарийвчлан төлөвлөсөн улсын хөрөнгө оруулалтын хөтөлбөрийг хавсаргах.” гэж тус тус заасан шаардлагад нийцүүлэн Монгол Улсын Тэргүүн шадар сайд бөгөөд Эдийн засаг, хөгжлийн сайдын 2025 оны А/13 дугаар тушаалын 1 дүгээр хавсралтаар баталсан “Монгол Улсыг болон аймаг, нийслэл, хотыг хөгжүүлэх таван жилийн үндсэн чиглэл боловсруулах аргачлал”-ыг баримтална.

## **Хоёр.Тогтоолын төслийн ерөнхий бүтэц, зохицуулах харилцаа, хамрах хүрээ**

Тогтоолын төсөл нь 4 заалт, 4 хавсралттай байх бөгөөд нэгдүгээр заалтад “Монгол Улсыг 2026-2030 онд хөгжүүлэх таван жилийн үндсэн чиглэл”-ийг нэгдүгээр хавсралтаар, “Монгол Улсыг 2026-2030 онд хөгжүүлэх таван жилийн үндсэн чиглэл”-ийн үр дүнг хоёрдугаар хавсралтаар, “Монгол Улсыг 2026-2030 онд хөгжүүлэх таван жилийн үндсэн чиглэл”-ийн үр дүнгийн хяналт-шинжилгээ, үнэлгээний үзүүлэлтийг гуравдугаар хавсралтаар, “Монгол Улсын 2026-2030 оны хөрөнгө оруулалтын хөтөлбөр”-ийг дөрөвдүгээр хавсралтаар тус тус батлах тухай, хоёрдугаар заалтад “Монгол Улсыг 2026-2030 онд хөгжүүлэх таван жилийн үндсэн чиглэл”, “Монгол Улсын 2026-2030 оны хөрөнгө оруулалтын хөтөлбөр”-ийн хэрэгжилтийг зохион байгуулахдаа эдийн засгийн нөхцөл байдал, бодлогын тэргүүлэх чиглэлтэй уялдуулж, холбогдох төсөл, арга хэмжээг Улсын хөгжлийн жилийн төлөвлөгөө болон санхүүжилтийг жил бүрийн улсын төсөвт тусгахыг Монгол Улсын Засгийн газарт даалгах тухай, гуравдугаар заалтад энэ тогтоолын хэрэгжилтэд хяналт тавьж ажиллахыг Монгол Улсын Их Хурлын Эдийн засгийн байнгын хороонд үүрэг болгох тухай, дөрөвдүгээр заалтад тогтоолыг дагаж мөрдөх хугацааны тухай тус тус тусгана.

## **Гурав.Тогтоолын төсөл батлагдсаны дараа үүсэж болох эдийн засаг, нийгэм, хууль зүйн үр дагавар, тэдгээрийг шийдвэрлэх талаар авч хэрэгжүүлэх арга хэмжээний санал**

Тогтоолын төсөл батлагдсанаар хүний хөгжлийн түвшин, дундаж давхаргыг нэмэгдүүлэх, эдийн засгийн төрөлжилтийг эрчимжүүлэх, боловсруулах үйлдвэрлэл, хөдөө аж ахуйн хөгжлийг шинэ шатанд гаргах, ногоон шилжилт, уур амьсгал ба сэргээгдэх эрчим хүчний шинэчлэлийн тогтвортой хөгжлийн суурийг бий болгох, эдийн засгийн эрх чөлөөг бэхжүүлж, бизнесийн орчны шинэчлэлийг гүнзгийрүүлэх, дижитал шилжилт, төрийн шинэчлэлийн ил тод, хариуцлагатай байдал, шударга ёсны тогтолцоог бэхжүүлэх боломж бүрдэнэ.

## **Дөрөв.Тогтоолын төсөл нь Монгол Улсын Үндсэн хууль, Монгол Улсын олон улсын гэрээ болон бусад хуультай хэрхэн уялдах, хуулийг хэрэгжүүлэхэд шинээр боловсруулах, хуульд нэмэлт, өөрчлөлт оруулах, хүчингүй болсонд тооцох тухай хууль тогтоомжийн талаарх санал**

Тогтоолын төсөл нь Монгол Улсын Үндсэн хууль, Монгол Улсын Их Хурлын тухай, Монгол Улсын Засгийн газрын тухай, Хөгжлийн бодлого, төлөвлөлт, түүний удирдлагын тухай, Төсвийн тухай, Хууль тогтоомжийн тухай хууль болон бусад хууль тогтоомжид бүрэн нийцнэ. Тогтоолын төсөлтэй холбогдуулан шинээр боловсруулах, нэмэлт, өөрчлөлт оруулах, хүчингүй болсонд тооцох тухай хууль, тогтоомжийн төсөл байхгүй болно.